

U ventilatore chî tomba e zinzale, una nuvità

TECNULUGIE NOVE L'intrapresa Biogent hà lanciàtu u so ventilatore chî permette di chjappà e zinzale senza prudutti tossichi è di manera naturale. D'inguernu, ùn c'hè tantu risicu ma quandu s'avvicinerà l'estate...

S'ellu ci hè un insettu chî nimu pò pate ghjè a zinzala. Quantu nottate arritti à circà induv'ella si hè pussuta ficà a zinzala ch'hà giratu ingiru à l'orechja? Una volta tomba ne ghjunghje subbitu un'altra è tira avanti è via. Esistenu parechje soluzioni cum'è e prise elettriche da fà fughje l'insettu o i prudutti da sparghje sì nant' à a pelle ma a prima hè tossica è l'altra dritu. Un intrapresa francese hà trovu a soluzione.

Dopu à 16 anni di ricerca, Biogent, hà lanciàtu u so pruduttu. Una trappula à zinzale. Un si parla nò di pruduttu nò di nunda chî puderia esse tossicu. L'affare hè semplice. Un ventilatore aspira e zinzale chî si trovanu chjappe in un filletu piazzatu in a trappula. E si morrenu di secchia o di fame. Allora cumu attira e zinzale? Cù l'aiutu di un picculu sacchittucciu chî riproduce l'odore di a pelle di l'omi. Piazzatu in a trappula, u ventilatore rimanda l'odore pè via di una surtita fatta apposta. U ventilatore deve fermà imbrancatu in permanenza sei mesi l'annu ma cunsumma pocu elettricità. "L'aghju compru st'estate chî eramu invaiti, spieca Marie, un utilisatore chî stà in Ghisunaccia.



U dispositivu Biogent sviluppatu da pudè tombà e zinzale.

À u principiu ci era una decina di zinzale à ghjornu in u sacchittucciu. Ma l'emu piazzatu in fondu di u giardinu è l'insetti ùn venianu più in casa. Dui mesi dopu, quant'è mè s'eranu abituati, tutti i

ghjorni era pienu u sacchittucciu. Sò almenu due o trè mila zinzale chî si facenu tombà à ghjornu. Ghjè veradimente una rivoluzione. N'aghju da comprà un altru pè piazzà lu da l'altu cantu di u giar-



/RITRATTI P.-M.S

dinu."

D'appressu à l'intrapresa ci vole à pocu pressu una stagione di funziunamentu da pudè sperà un'estate senza zinzale à u giru di a casa. U tempu di tombà quelle chî fa-

cenu l'ove. U prezzu ellu hè abbastanza caru postu chî ci vole à contà in i 150 € pè un ventilatore chî ghjè attivu nant' à 5 à 600 metri quadrati.

PAUL-MATHIEU SANTUCCI